

Potong kuota diesel, harga ikan naik mendadak

UM 10/4/2023 Ms: 1

Oleh MOHAMAD ATHIR
ISMAIL

athir.ismail@mediamulia.com.my

KUALA SELANGOR: Harga ikan dan makanan laut lain dikhuatiri meningkat lebih tinggi ekoran keputusan kerajaan melaksanakan pemotongan diesel bersubsidi dari 90 juta liter kepada 70 juta liter pada setiap bulan sejak Januari lalu.

Malah di Selangor, harga sesetengah ikan naik mendadak melebihi 100 peratus pada tahun ini susulan pemotongan diesel itu yang bertujuan menyekat ketirisan bahan api itu.

Pemotongan diesel bersubsidi tersebut menjejaskan nelayan-nelayan bot laut dalam seperti kelas B dan C di seluruh negara sekali gus memberi tekanan kepada peniaga termasuk di jeti.

Tinjauan *Utusan Malaysia* di Pengkalan Nelayan Sementa, Klang dan Pasar Nelayan Sungai Yu di sini mendapati harga ikan seperti kembong, pelaling, senangin dan sotong kecil kini dijual antara RM8 hingga RM35 setiap kilogram (kg).

Paling ketara harga ikan pelaling atau 'ikan rakyat' naik melebihi 100 peratus iaitu daripada RM5 sekilogram kepada RM19 sekilogram.

Bersambung di muka 3

Potong kuota diesel, harga ikan naik mendadak

Dari muka 1

Malah, dalam tinjauan tersebut dua pemilik gerai tidak lagi menjual ikan tersebut berikutan harganya terlalu mahal.

Seorang pemilik gerai di Pengkalan Nelayan Sementa, Amir Shah berkata, akhir-akhir ini margin keuntungannya semakin kecil selepas berdepan tekanan kenaikan harga daripada pembekal yang terdiri daripada nelayan kecil dan bot besar.

Menurutnya, dua jenis hasil laut seperti pelaling dan sotong tidak lagi dijual di gerainya sejak beberapa minggu lalu apabila harga makanan itu terlalu mahal.

Katanya, jika mahu jual juga perlu melebihi RM20 sekilogram bagi ikan pelaling dan sotong pula mencecah RM30 sekilogram.

“Secara umumnya ikan tidak berkurang, tetapi jualan yang berkurang. Sebelum ini 50kg ikan dalam dua hingga tiga hari, sekarang dalam tempoh sama cuma dapat jual sekitar 30kg. Memang nampak kuasa beli pengguna berkurangan.

“Disebabkan itu juga saya tak boleh jual pada margin harga sebelum ini iaitu, mesti dikurangkan (menjadi RM2 hingga RM8), supaya pelanggan tak lari kerana Pengkalan Nelayan Sementa

TINJAUAN HARGA IKAN DI PANGKALAN NELAYAN SEMENTA DAN PASAR NELAYAN SUNGAI YU

Ikan	Harga dahulu	Harga semasa	Peratusan kenaikan
Kembong	RM16	RM24	50
Pelaling	RM5	RM19	280
Tuna	RM13	RM15	15.3
Senangin	RM25	RM28	12
Bawal emas	RM26	RM30	15.3
Bawal hitam	RM25	RM34	36
Bawal putih	RM34	RM43	29.4
Bawap padi	RM8	RM8	-
Cencaru	RM12	RM12	-
Merah	-	RM38 (Sementa)	-
	RM35	RM45 (Sungai Yu)	28.6
Jenahak	RM38	RM38	-
Sotong kecil	RM24	RM35	45.8

adalah tumpuan pelanggan dari Kuala Lumpur, Bangi, Shah Alam, Banting dan sekitar kawasan ini,” katanya ketika ditemui.

Kata Amir, ikan bawal padi kini menjadi pengganti kepada pelaling kerana boleh dijual pada harga RM8 sekilogram, namun saiz dan kuantiti isinya lebih sedikit

berbanding pelaling.

Pada 23 Disember lalu, Lembaga Kemajuan Ikan Malaysia (LKIM) melaksanakan Pelarasan Kuota Subsidi Diesel Kepada Vesel Nelayan yang diluluskan dalam Mesyuarat Jawatankuasa Induk Pelaksanaan Skim Subsidi Diesel dan Petrol Nelayan Bilan-

gan 2 Tahun 2022.

Dalam mesyuarat itu, diputuskan kuota baharu diesel bagi bot-bot kategori B dan C dikurangkan kepada 12,000 dan 17,000 liter sebulan berbanding 16,000 dan 20,000 liter sebulan sebelum ini.

Kadar kuota asal subsidi diesel bagi bot pukat jerut Zon C dari 13,000 liter dikurangkan kepada 12,000 liter sebulan. Seterusnya, kuota asal pemberian subsidi diesel bagi bot pukat jerut Zon B dari 8,000 liter dikurangkan kepada 7,000 liter sebulan.

Sementara itu, Muhammad Hanafi Marzuki, 32, peniaga di Pasar Nelayan Sungai Yu berkata, jualan di gerainya naik sekurang-kurangnya 12 peratus sejak tahun ini terutama melibatkan ikan-ikan lazim dimakan seperti kembong, pelaling, bawal hitam dan bawal putih.

“Saya macam tak percaya, ikan pelaling paling laku di gerai saya memandangkan pasar ini pun terletak dalam kawasan kampung. Sejak tahun ini saya tidak lagi jual pelaling sebab tak munasabah.

“Daripada berhabis RM20 ke RM30 untuk ikan pelaling, lebih baik beli ikan cencaru yang harganya masih kekal RM12 sekilogram, kembong dan senangin yang isinya lebih banyak dan enak,” jelasnya.